



TAPAK 10

Faf du Plessis Test asaya nungi anener

TAPAK 8

New Zealand sepaitem kum 20 sülen Afghan yutsür aotsü

VOL. XVIII NO. 125 (ADOK 125) DIMAPUR

YANGTEPNÜ (THURSDAY) TSÜKLAI (FEBRUARY) 18, 2021 ₹ 5.00

COVID-19 Nagaland: Nisung 36 dang anepaludar

Kohima, February 17 (TYO): Bodbarnü Nagaland nung nisung ka dak danga COVID-19 aliba meputet saka nisung 5 taneptsü nguogo. Iba ajanga taneptsü angur 97.72% kumogo.

"Tanü nisung shinga daka COVID-19 aliba meputet. Maneni, Dimapur nungi nisung 3 aser Kohima nungi nisung 2 taneptsü angu" ta Health & Family Welfare Minister, S Pangnyu Phom-i metetdaksü.

Nisung 12,190 rongnungi 11,913 taneptsü nguogo aser tang nisung 36 anepaludar, ta paisa ashi.

"Nagaland nung COVID-19 puteta alir nisung 90 süogo saka tasürtem rongnung parnok 10 bo tanga timtem ajanga asü. Ano, nisung 151 tanga state temi ogo" ta Health & Family Welfare Director, Dr Denis Hangsing-i ashi.

District balala nung COVI-19 putetba: Dimapur (6,477), Kohima (3,873), Mon (605), Peren (507), Tuensang (248), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,190 rongnung Traced Contacts 5,072, armed forces personnel 4,674, tanga state tem nungi arur 1,871 aser frontline workers

573 lir, ta Dr Hangsing-isa ashi.

District balala nung tang anepalurtem: Kohima (27) aser Dimapur (9).

"Tang anepalurtem rongnung nisung ka dak shirangba yimya tera lir saka 36 dakbo shirangba yimya kecha mali" ta paisa shisem.

Taneptsü angurtem: Dimapur (6,332), Kohima (3,781), Mon (594), Peren (506), Tuensang (246), Mokokchung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemi bilemba sample 1,28,623 tendangogo. RT-PCR ajanga sample 74,513, TrueNat ajanga sample 37,288 aser Rapid Antigen Test ajanga sample 16,822 tendang" ta Dr Hangsing-isa ashi.

"Mongulbar tashi nung Nagaland nung nisung 14,980 nem COVISHIELD vaccine 16,189 agütsüogo. Vaccine agirtemji frontline workers 7,417 aser healthcare professionals 7,563 lir" ta State Immunization Officer, Dr Ritu Thurr-i metetdaksü.

"Healthcare workers rongnung parnok 1,209-i COVID-19 vaccine tanabuba dose agiogo" ta Dr Ritu Thurr-isa ashi.

CNCCI-i totzü jenjang atuba reprangshimtsü akhanger

Dimapur, February 17 (TYO): Nagaland sorkari totzü nung jenjang talila atuba mazüokba atema jashir ta Confederation of Nagaland Chamber of Commerce and Industry (CNCCI)-i metetdaksüogo.

"Totzü nung jenjang atuba ajanga state indang rongsenkettsüng nung kongshir aser Assam o Meghalaya state sorkartemibo sensotem aser shishilembartemi khuret ajuruba angatetogo. Ajisüaka, Nagaland state sorkaribo iba atema mebilemba aser totzü jenjang mazüokba atema süngmanger" ta CNCCI-i sangdong ka nung ashi.

Nagaland nung totzü jenjang atuba den gari lenmang majungba ajanga shishilembartemi timtem jenti ajurur. Maneni, passenger

senzüsenbongba taa kanga tasak kumogo mapang shia taa tupet atur, ta parnokisa ashi.

Ano, kidanger state tem den meputepba ajanga Nagaland nung totzü ayokertemia timtem ajurutsü aser iba ajanga state sorkari VAT agiba nung sen aruba nung akoksatsü, ta CNCCI-isa metetdaksüogo.

Totzü nung jenjang kanga atuba ajanga rongsenkettsüng aser shishilembaba tsütsü kanga mejungi kongshiogo, anungji state sorkari iba atema tebilemstü khuret bena mapa inyaksüla. Ano, commercial passenger vehicles nung nisung amenba tetuyuba meyipa reprangshitsüla aser para ajemtsü atema gari nung amentsüpur ajak mendaktsütsüla, ta parnokisa ashi.

February 17, 2021 nü Assam Meghalaya den Nagaland nung totzü jenjang yamai lir:

DISTRICT/STATE	DIESEL	PETROL
Kohima, Nagaland	Rs 83.60	Rs 92.86
Shillong, Meghalaya	Rs 79.34	Rs 86.04
Guwahati, Assam	Rs 80.61	Rs 86.43

(Source: mypetrolprice.com)

NITI Aayog atema senden amen

Dimapur, February 17 (TYO): Bodbarnü Chief Minister indang Residential Office nung NITI Aayog indang 6 buba Governing Council senden menogo.

Iba senden ya February 20, 2021 nü amentsüba sentong liasü saka tanü jelia menogo.

Senden nung Chief Secretary aser tanga tongti ketdangsürtemi Chief Minister, Neiphiu Rio den

mapa adoktsüba, Naga Model Integrated Settled Farming nung tenük yoker aluyimba sentong renemtsüba aser physical infrastructure tajungba kümdaktsütsü indang onüktem lemsatepa liasü.

Iba senden nungsa human resource development, service delivery aser healthcare sector dak sendakba onüktem lemsatep.

Nagaland nung NHP kübok State Data Center (SDC) lapokogo



February 17, 2021 nü Chief Minister, Neiphiu Rio-i Water Resources Department Advisor, Namri Nchang lia State Data Center (SDC) lapoktsüdang agiba noksa angur. (Kohima, February 17)

Dimapur, February 17 (TYO): February 17, 2021 nü Chief Minister, Neiphiu Rio-i State Data Center (SDC) lapoktsüogo. Iba ya National Hydrology Project kübok yanglu.

Tanü CM Rio-i Water Resources Department, Kohima nung Chief Engineer indang Office nung SDC lapoktsü.

"State Data Center lapokba ajanga tajangzüka aika angutsü aser National Hydrology Project

indang tongti alizüngji water resources osang tajungba bendentsü aser state ajungalen water resources management tashi itdaktsütsü atema lir" ta Rio-i ashi.

"Water Resources Department ketdangsürtemi nübortem dang tzü timi amshitsü atema tesayuba agütsütsüla kechiyong linük nung tzünglu timtiba aruba state tem rongnung Nagaland dena lir" ta paisa

ayongzü.

State Data Center lapokba ajanga Department-i anogoshia manual data bendentsü aser National Hydrology Project kübok teloktem den sendaktepa alirtem den lemsateptsü, ta Water Resources Department Advisor, Namri Nchang-ia metetdaksü.

Sentong nung Executive Engineer, Water Resources, Er. Wapangnaro Imchen-i Technical report metetdaksü.

Naga nungeri yimten jungjunga latetnür: TR Zeliang

Dimapur, February 17 (TYO): Mongulbarnü NLA nung Opposition leader TR Zeliang-i Naga yimten tebilemstü atema olemtepdang "Naga yimten tebilemstü ya shiba shitak ta masü saka Naga nunger atema kechi shitak asütsü ta asüba lir" ta metetdaksü.

Küm aika asenoki ajaki agizüktettsüsa telemteba ka agitsü atema meranga arur aser ibaji India kübok state 4 aser linük 2 nung aliba Naga nunger taginüba lir, ta pai ashi.

"Naga yimten telok aser Naga lennir shiai Naga nunger atema tajungtiba aginür aser iba dak sendakba nung parnoki Naga nunger atema bendanga agüja meranogo. Naga yimten teloktem tsüngda tesentaktep mejungi lir, anungji nübortem shimtetba MLA tem ama

asenoki tiyongtsü ia, parnok tsüngda mangatettep alibatem bentettsüla aser tesentaktep yanglutsüla" ta TR Zeliang-isa metetdaksü.

"NPF indang Political Affairs Mission (PAM)-i 'One Solution, One Accord' atema noktaker. PAM-i CSOs aser Naga yimten telok balala den jembitepa arudang, parnok ajaki One Solution atema molunga aliba shiogo" ta paisa ashi.

"PDA sorkari October 15, 2020 nü kasa tangatetba- "One Solution for One People" nung telemteba agiogo. Naga putiotsü otsü aser yimten temetentem nung ajemdaker dang yimten latettsü. Anungji, Naga putiotsü otsü aser yimten balaka ta asübaji mapa küma inyaksüla. Naga nungeri aginüba ama telemteba ka

agitsü atema India sorkaria sentong renema inyaksüla aser iba ajangaji dang asen lima nung teti atema yimjung bener arutsü" ta TR Zeliang-isa metetdaksü.

NPF-i teti Naga nunger ajak atema inyaka arur aser yimtenjia kasa tangatetba nung latettsüla. Naga yimten telok ajaki India sorkar den ceasefire agreement nung sign asütsüla aser Naga yimten latettsü atema inyaksüla, ta paisa ashi.

"Asenoki angazükbatem rongnung tajungtibatemji tesüiba mapang atalokba nungi lir. Angazüksü atema aibelener aser lephsia aibelen masütsüla Tesüiba Agreements aser Accords nungi asenoki angazüksüla aser iba nungji ajemdaker telemteba tajung agitsüla" ta TR Zeliang-isa metetdaksü.

NLA nung Nagaland GST amendment bill agizükogo

Kohima, February 17 (TYO): Mongulbarnü Nagaland Legislative Assembly nung Nagaland Goods and Services Tax (Fourth Amendment) Bill, 2020 agizükogo.

February 15, 2021 nü Chief Minister Neiphiu Rio-i iba Bill benoka liasü aser pai ashiba agi July 1, 2017 nungi Nagaland nung Goods and Services Tax (GST) mapa küma tenzükogo.

GST nung telemsa ana lir- ka

Central Goods and Services Tax (CGST) aser ka State Goods and Services Tax (SGST) lir.

Centre sorkari Finance Act (No. 12) of 2020 ajanga Central Goods and Services Tax (CGST) Act, 2017 nung temelenshi kar süogo aser state sorkartem dang pei pei state indang State Goods and Services Tax Act nung kasa melenshitsu mepishia liasü.

"Iba mapang Nagaland Legislative Assembly session mali

asünung, Nagaland Governor-i December 20, 2021 nü Nagaland Goods and Services Tax (Fourth Amendment) Ordinance, 2020 oziung agütsü aser ibaji Nagaland Gazette Extraordinary ajanga sangdongogo" ta CM Rio-isa metetdaksü.

Nagaland Goods and Services Tax (Fourth Amendment) Bill, 2020 ajanga Nagaland Goods and Services Tax Act, 2017 tajungba kümdaktsütsü, ta paisa ashi.

KLC nung Consumer Protection Act 2019 indang sentong ka agi



Asst. Professor aser NVCO tir, Kezhokhoto Savi den Kohima Law College indang LL.B 1st Semester nung azünger kaketshirtem Consumer Protection Act, 2019 nung ajemdaker February 17, 2021 nü Kohima Law College nung One Day special session agiba mapang tangokba noksa ka yangi agur.

Dimapur, Tsüklai/February 17 (TYO): Kohima Law College nung February 17, 2021 nü Consumer Protection Act, 2019 indang One Day special session agia liasü.

Iba sentong ya alakteta LL.B 1st Semester pur atema ayongzüka liasü, kong Nagaland Voluntary Consumers' Organisation (NVCO) tir aser Asst. Professor Kezhokhoto Savi aser subject teacher tem shisalen sayur liasü.

Consumer Protection Act, 1986, koba LL.B 1st Semester study course nung lir, ibai Consumer Protection Act, 2019 ajanga jungjunga melenogo aser tang Consumer Protection Act, 2019 ya mapa kuma inyaksü atema Nagaland sorkari tekeratiba nung Rules and Regulation yanglua aser Nagaland University ajanga Consumer Protection Act, 2019 nung ajemdaker syllabus tasen yanglutsü nungdak ta Kohima Law College-i angateta iba sentong ya ayongzüka liasü.

National Award angur Kezhokhoto Savi-i iba senden nung jembiba mapang, Nagaland Law Students' Federation (NLSF) ajanga tawa Nagaland University nem Consumer Protection Act, 2019 nung syllabus tasen yanglutsü atema tezüluba agütsüogo,

kechiaser Nagaland University kübok law college asem aliba ya Consumer Protection Act, 1986 agi mangmanger aser joko mapet kümogo, ta ashi.

NVCO ajanga state sorkar dang tekeratiba nung Consumer Protection Act, 2019 ya mapa kuma amshitsü atema jembio, ta pai ashi.

Consumer Protection Act, 2019 nung rangloker ayongzüka iba session balaka ya LL.B 1st Semester nung aliba kaketshirtem atema tenügdaksü kumogo kechiaser ibai parnok indang study course nung lir aser ajidang masü jila aser yimtsüngtem nung nübur/ consumer tem kumzüka alitsü atema iba Act ya kanga tongtipang kumogo, anungji yimtsüngtem nunga Consumer Rights angazüktsü atema awareness agütsütsü tim, ta Savi-i ashi.

State nung tang tashi awareness agi anünga lir, kechiaser osettsüset meshidakba aser services junga magütsüba ajanga consumer tem timtem ajurur, kechiaser nüburtemi mapang süyir aliba osettem alir aser ajidang masü sen tali temloker agütsür, ta pai ashi.

Pai consumer tem dang saksü aser consumer rights metettsü ya pei mapa ta

angatettsü ayongzü.

NVCO ajanga Consumer Protection Act, 2019 indang awareness sentongtem maneni agitsü aser March 15 nü World Consumer Rights Day sentong ya state nung nüburtem nem awareness tali agütsütsü mechi hopta tepiyong amungtsü, ta ashi.

Iba Act tasenba indang rateta jembiba mapang, iba Bill ya ajanga consumer temeden ajungkettsü, wazüka ayutsü aser amshitsü; tim mesüi yokyayokchiba ajanga timtem adokba nungi consumer tem kumzüka ayutsü aser osettsüset meyipa agütsütsü, senotsü meyipa agitsü atema Central Consumer Protection Authority (CCPA) nungja agütsür executive agency amenoktsü mela lir, ta Savi-i ashi.

Osettsüset mesüra chiyongtsü tamajung amshiba/ achiba ajanga consumer temang nung timtem ajuruba atema mera agitsü asoshia iba Bill nung tejangja shia lir. Maneni 'Mediation' ya Alternate Dispute Resolution Mechanism ama amshitsü mela lir.

Ajidang masü iba Bill yagi Consumer Disputes Redressal Agencies amenoka consumer temeden bushitsü melar, ta paisa ashi.

Mkg DCC sanen luden senden jateper

Mokokchung, FEB 17 (TYO): District Congress Committee (DCC) pur Feb 22, 2021 nü anepdang 11:00 ako nungi tenzüka party office nung sanen luden senden akatsü, anungji, PCC member-tem, Ex-INC candidate /former MLA/ Minister-tem, DCC Advisor, Frontal President & Secretary-

tem, Mahila official, ACCC ajak nungi President & Secretary-tem aser DCC ketdangpurtem ajak iba senden nung arua adentsü asoshi Mokokchung DCC President aser Secretary, Watimongba Aier aser P. Aley nati sangdong ka ajanga mepishia metetdaksüogo.

FAC nung Associate Prof. Dr. Imtiwati Jamir den tepila sentong agi



Dimapur, Tsüklai/February 17 (TYO): Fazl Ali College, Mokokchung nung azüngba kaketshir aser tesayurtemi college indang Conference Hall nung tesayur tejen, Dr. Imtiwati Jamir sorkar mapa nungi anisüngzüka tenü nung tepila sentong ka February 17, 2021 nü ayongzüka agia liasü.

Küm 35 jungnüa tesayur mapa inyakba sülen Dr. Imtiwati Jamir ya Associate Professor aser Department of Physics, FAC nung tekolakba ama mapa nungi anener.

Naomi menden sür agiba tepila sentong nungya tesayur aser tesayur masüba staff tem dena liasü. Iba sentong ya Dr. Zuizui Iheilung-i sarasadema tenzük aser department of Physics nungi tesayurtemi pa nem akhum agüja ken tajung ka aten.

Iba sentong nung Principal, Fazl Ali College, Helen Jamiri jembiba mapang Dr. Imtiwati

Jamir den külemi college nung inyakba mapang ajangshibatem lai bilemteta jembia liasü.

Lai Dr. Imtiwati Jamir ya bendanga agütsür inyakba medemsor ka aser nübu tajung ka lir, shibai college ajungkettsü aser renloktsü mechi anibelem mesasai bendanga agüja tenzükogo, ta ashi.

Maneni Dr. Bendangtemjen (FACTA), Tongzuk (H.A Establishment), Dr. Lanurenla (IQAC), Dr. Abhijet (Physics Department), Tiatemsu (Botany Dept.), Dr. Tsukjemchila (Geography Dept) aser Imsunaro (Functional English) nungertemia iba sentong nung tepila o jembia liasü.

Dr. Imtiwati Jamiri sentong nung jembiba mapang tesayurtem dang kaketshir asoshi nükrangdong ka ama alitsü ayongzüka liasü.

Sentong tatemi Dr. Imtiwati Longkumeri sarasadema sentong tembanga liasü.

GOVERNMENT OF NAGALAND DIRECTORATE OF TECHNICAL EDUCATION NAGALAND, KOHIMA NOTIFICATION

NO. DTE/ ESTT-2/12/2018-19/: This is to invite an application in plain paper from the interested and eligible NEET(UG)2020 candidates who have already submitted NEET form to Directorate of Technical Education opting BAMS course to undergo BAMS course of study at Government Ayurvedic College & Hospital, Guwahati.

Last date for submission of application to the undersigned by hand or through email: dtenagaland@gmail.com is on or before 22th February 2021, at 3:00 PM. Selection shall be done purely on the basis of NEET(UG) 2020 merit from amongst the application received. The last date of reporting to the institute for admission is 28th February 2021.

(ER. VIPULHOU LHOUNGU)

Issued by DIPR

Joint Director.

Nagaland tesem balala nung tang nungi helicopter tayimtsü senzüsüba mapang yamai alitsü.:

MONDAY	TUESDAY	WEDNESDAY	THURSDAY	FRIDAY	SATURDAY	SUNDAY
Dimapur Dep: 0830 Hrs.	Dimapur Dep: 0830 Hrs.	Dimapur Dep: 0830 Hrs.	Dimapur Dep: 0830 Hrs.	Dimapur Dep: 0830 Hrs.	Dimapur Dep: 0830 Hrs.	
A Mokokchung	A Tuensang	A Mon	A Tuensang	A Kiphire	A Zunheboto	
B Tobu	B Tizit	B Phek	B Longleng	B Wokha	B Mokokchung	
A Arr: 0910 Hrs. Dep: 0910 Hrs.	A Arr: 0915 Hrs. Dep: 0915 Hrs.	A Arr: 0915 Hrs. Dep: 0930 Hrs.	A Arr: 0915 Hrs. Dep: 0915 Hrs.	A Arr: 0915 Hrs. Dep: 0915 Hrs.	A Arr: 0905 Hrs. Dep: 0905 Hrs.	
B Arr: 0925 Hrs. Dep: 0925 Hrs.	B Arr: 0930 Hrs. Dep: 0930 Hrs.	B Arr: 0900 Hrs. Dep: 0900 Hrs.	B Arr: 0915 Hrs. Dep: 0915 Hrs.	B Arr: 0855 Hrs. Dep: 0855 Hrs.	B Arr: 0910 Hrs. Dep: 0910 Hrs.	
Dimapur	Dimapur	Dimapur	Dimapur	Dimapur	Dimapur	
A Arr: 0950 Hrs. Dep: 0950 Hrs.	A Arr: 1000 Hrs. Dep: 1000 Hrs.	A Arr: 1030 Hrs. Dep: 1030 Hrs.	A Arr: 1000 Hrs. Dep: 1000 Hrs.	A Arr: 1000 Hrs. Dep: 1000 Hrs.	A Arr: 0940 Hrs. Dep: 0940 Hrs.	
B Arr: 1020 Hrs. Dep: 1020 Hrs.	B Arr: 1030 Hrs. Dep: 1030 Hrs.	B Arr: 0930 Hrs. Dep: 0930 Hrs.	B Arr: 1000 Hrs. Dep: 1000 Hrs.	B Arr: 0920 Hrs. Dep: 0920 Hrs.	B Arr: 0950 Hrs. Dep: 0950 Hrs.	
A Noklak	A Zunheboto	A Aghunato	A Shamator	A Pfutsero	A Meluri	
B Kiphire	B Peren	B Pungro	B Zunheboto	B Seyochung	B Tuensang	
A Arr: 1040 Hrs. Dep: 1040 Hrs.	A Arr: 1035 Hrs. Dep: 1035 Hrs.	A Arr: 1105 Hrs. Dep: 1105 Hrs.	A Arr: 1045 Hrs. Dep: 1045 Hrs.	A Arr: 1030 Hrs. Dep: 1030 Hrs.	A Arr: 1020 Hrs. Dep: 1020 Hrs.	
B Arr: 1105 Hrs. Dep: 1105 Hrs.	B Arr: 1055 Hrs. Dep: 1055 Hrs.	B Arr: 1015 Hrs. Dep: 1015 Hrs.	B Arr: 1035 Hrs. Dep: 1035 Hrs.	B Arr: 1005 Hrs. Dep: 1005 Hrs.	B Arr: 1035 Hrs. Dep: 1035 Hrs.	
Dimapur	Dimapur	Dimapur	Dimapur	Dimapur	Dimapur	
A Arr: 1130 Hrs. Dep: 1130 Hrs.	A Arr: 1110 Hrs. Dep: 1110 Hrs.	A Arr: 1140 Hrs. Dep: 1140 Hrs.	A Arr: 1130 Hrs.	A Arr: 1100 Hrs. Dep: 1100 Hrs.	A Arr: 1100 Hrs.	
B Arr: 1150 Hrs.	B Arr: 1120 Hrs.	B Arr: 1100 Hrs.	B Arr: 1105 Hrs.	B Arr: 1050 Hrs.	B Arr: 1120 Hrs.	
A Kohima	A Kiphire	A Mokokchung		A Kohima		
A Arr: 1200 Hrs. Dep: 1200 Hrs.	A Arr: 1155 Hrs. Dep: 1155 Hrs.	A Arr: 1225 Hrs. Dep: 1225 Hrs.		A Arr: 1130 Hrs. Dep: 1130 Hrs.		
Dimapur	Dimapur	Dimapur		Dimapur		
A Arr: 1230 Hrs.	Dep: 1240 Hrs.	A Arr: 1315 Hrs.		A Arr: 1200 Hrs.		

Helicopter
Maintenance
Day

TASOBA KUM 100 AJUNGBA TEPELA

Tanü Ojala & Otsüla Tasoba Küm 100 Ajunger



18:02:1921 - 18:02:2021

Imsüwala Jamirtsür (Akhoya)

O ja, Nai Tsüngrem tsübuba dak tamang yur sarasadema lia aruba ajanga, Tulusang Tsüngremi na awapanger azükaru anir arua, tanü na küm 100 abensaba asoshi tepela nung Tsüngrem nem tenüngsang tulu agütsür. Tsüngremi na ano arishi talang moajang ta onoki sarasademtsür.

- Jala jabasotem, semchirtem aser kinungertem.

ASLB-I ACHAAYANGA AGIBA ARANGTET TATIDANG MEZÜNGBUBAREN, 2021

TAKOK ANGURTEM YAMAI SANGDONGER:

ACT 101-102 : Tatidang agütsür: 2 3rd Division: Roll No. 2	Takok angur: 1	Tamakok angur: 1
ACT 201-202: Tatidang agütsür: 6 1st Division: Roll No. 4 & 6 2nd Division: Roll No. 1, 2, 3 & 5	Takok angur: 6	Tamakok angur: Nil
ACT 301-302: Tatidang agütsür: 5 1st Division : Roll No. 2, 4**, 5* & 7* 2nd Division: Roll No. 3	Takok angur: 5	Tamakok angur: Nil
ACT 501-502: Tatidang agütsür: 4 1st Division: Roll No. 1*, 3 & 4** 2nd Division: Roll No. 2	Takok angur: 4	Tamakok angur: Nil
ADT 101-103 : Tatidang agütsür: 10 1st Division: Roll No. 4 & 10 2nd Division: Roll No. 6 & 8 3rd Division: Roll No. 7 & 14	Takok angur: 6	Tamakok angur: 4
ADT 201-203: Tatidang agütsür: 5 1st Division: Roll No. 1, 3, 4 & 5 2nd Division: Roll No. 6	Takok angur: 5	Tamakok angur: Nil
ADT 301-303: Tatidang agütsür: 13 1st Division: Roll No. 3*, 6**, 7**, 9, 11, 12 & 13 2nd Division: Roll No. 1, 2, 5, 8, 10 & 14	Takok angur: 13	Tamakok angur: Nil
PGDT 601-603: Tatidang agütsür: 9 1st Division: Roll No. 1***, 3*, 4, 7**, 8, 9 & 10 2nd Division: Roll No. 5 & 6	Takok angur: 9	Tamakok angur: Nil

Temetetsü:

1. Marksheets Tsüklai 23-28, 2021 tsüngda tabeni arutsü, shirnok marksheet tabeni arudir Admit Card Photostat copy ka bener arua agizüksüla.
2. PGDT 701-703 nung tatidang agütsür alir item Roll No. tem iba takoker osang sangdongba anogo nungi ita ka tsüngda nung Dissertation onük office tongtsütsüla.

Roll No. 1, 2, 3, 4, 5, 6, 8 & 9.

Sd/-

Rev. Prof. Rongsen Lkr
Convenor ASLB, AC

Sd/-

I. Temjen Tzüdir
Secretary ASLB, AC.

Biplab Deb-i Harvard University indang aibelena jembu

Agartala, February 17 (Agencies): Tripura Chief Minister Biplab Deb-i tesüiba mapangtem nung aibelena aika jembia aruogo aser tanga pai alima nung nungtu Harvard University ya London nung lir ta shiogo.

Mongulbarnü Tripura Central University nung sentong ka nung jembidang Biplab Deb-i iba onük jembu.

"University ka ajanga yimti mesüra tesem ka nungtu kumdaksür. Kodang asenoki England mesüra London bilemdir, asen yimdangi Cambridge University aser



Biplab Deb (File photo)

Harvard University noksatem arur" ta Deb-i ashi.

Ajisüaka, Harvard University ya London nung masü saka United States kübok

Massachusetts nung lir.

Harvard University ya 1636 küm lapok aser United States nung higher learning indang reju tejentiba lir. Alima nung reju tajungtibatem rongnung Harvard University ya ka lir.

Ajisüaka, Tripura Chief Minister Biplab Deb-i geography indang meblem dangi jembir.

Yaküm Biplab Deb-i Amazon rainforest ya Africa nung lir ta ashi. Saka atangji nungbo Amazon rainforest ya Brazil nung lir aser iba min ya Colombia, Peru aser tanga South America linüktem nunga densema lir.

Guwahati nung Martyrs' Memorial atema gamosa lakh 50 bendentsü

Guwahati, February 17 ashi.

(Agencies): Guwahati nung Martyrs' Memorial atema Congress-i Assamese gamosa lakh 50 bendentsü.

Bodbarnü Assam Congress-i CAA (Citizenship Amendment Act) anema noktakba akangashi aser party züngsem dang state nung kilen shia sema aotsü aser CAA anema züluba gamosa tem bendentsü metetdaksü.

"Congress-i Guwahati nung CAA anema memorial ka yanglutsü aser ni Assamese nung jak dang gamosa nung CAA anema zülur agütsütsü mepishir" ta Congress Manifesto Committee chairman Gaurav Gogoi-i ashi.

"Nenoki gamosa nung sign asütsü akok aser courier ajanga mesüra teka agi party züngsem nem agüjangma" ta Gogoi-isa

"Putiotsü nung shilem ka agütsü maongka angutsü. Assam nung CAA magizüker aser nü tenüng gamosa nung zülur onok nem agüjangma" ta paisa ashi.

"Nai agütsüba gamosa ji Guwahati nung CAA anema yangluba memorial nung ayutsü" ta Gogoi-isa shisem.

"Assam nung Gamosa lakh 50 tashi bendentsü ta onoki imlar aser ajakji memorial nung ayutsü" ta Assam Pradesh Congress Committee (APCC) president Ripun Bora-ia ashi.

"CAA tera nungi atsüdoktsü aser asenoki putiotsü yanglutsü. Assam Congress temepishiba ama nenoki tenüng aser CAA anema gamosa nung züluba. Ibaji Congress party office dangi yokang. Nai agütsüba gamosa ji CAA anema yangluba memorial nung ayutsü" ta paisa ashi.

Assam Congress-i totzü nung jenjang atuba anema lungkak ait



Lakhimpur, February 17

(Agencies): Congress-i Lakhimpur nung petrol aser diesel jenjang kanga atuba anema lungkak aitba sentong ka ayonga agiogo.

Iba sentong nung Assam Congress tir Ripun Bora aser Lok Sabha MP Pradyut Bordoloi nati anir Congress tongti lennirtem aden.

Lakhimpur district kübok Dhalpur nung Congress-i lungkak aitba sentongji

ayongzüka agi.

BJP-i aniba state sorkari state nung kechisarena nung jenjang atuba azüokang ta Assam Congress-i takhangba agütsüogo.

Bodbarnü Guwahati nung petrol litre nung Rs 86.46 aser diesel litre nung Rs 80.62 lir.

Assam nung oil refineries 4 tashi lir saka Meghalaya dang nungibo Assam nungang petrol aser diesel jenjang timba agi ayoker.



HIGH SCHOOL JUNCTION BRANCH
High School Junction, Vizo Commercial Centre,
Kohima, Nagaland- 797 001
Email: vjhigh@bankofbaroda.co.in

POSSESSION NOTICE (For Immovable Property)

APPENDIX IV under Act- Rule 8(1)

Securitization and Reconstruction of Financial Assets and Security Interest Act, 2002 aser Security Interest (Enforcement) Rules, 2002 nung Rule- 3 den Sec. 13 (2) ajanga Authorized Officer of **Bank of Baroda, High School Junction Branch, Kohima, Nagaland State-i 03.10.2019** nü Borrower / Mortgagor / Guarantor (1) **M/s. Speedwell, Proprietor Mr. Impa Longkumer, S/o Masatuba Longkumer, House No. 1, Block No.1, Lower Chandmari Colony, Below Cross Wonder Church, Kohima, Nagaland State- 797001.** Guarantor: (1) **Mr. Tenjuk Aier, S/o Wati Aier, House No. 123, Diphupar, Dimapur Sadar, Dimapur, Nagaland State- 797112,** (2) **Mrs. Yangtila Longkumer, W/o Mr. Impa Longkumer, S/o Masatuba Longkumer, House No. 1, Block No.1, Lower Chandmari Colony, Below Cross Wonder Church, Kohima, Nagaland State- 797001** dang **Rs. 1,98,73,459.16 (Rupees One Crore Ninety Eight Lakh Seventy Three Thousand Four Hundred Fifty Nine and Sixteen Paise only)** temenoktsü aliba agütsütsü atema metetdaksüogo, 30-09-2019 tashi nung interest densema, **01-10-2019** nungi anogo 60 tsüngda agütsütsü sangoktsü.

Borrower / Guarantor / Mortgagor-i senji meyipa magütsü, anungji kiojen indang Borrower / Guarantor / Owner aser public dang tsünglanglen sign süa alirtemi **February 12, 2021** nü Act nung Section 13 nung Sub-section (4) aser Security Interest (Enforcement) Rules, 2002 nung rule 8 & 9 nung tashi agüja aliba ama kiojen agiogo.

Borrower / Guarantor / Mortgagor aser public-i iba kiojen asoshi kecha meinyaktsü aser inyaktüsü kümra Bank of Baroda nem 30.09.2019 tashi nung interest densema **Rs. 1,98,73,459.16 (Rupees One Crore Ninety Eight Lakh Seventy Three Thousand Four Hundred Fifty Nine and Sixteen Paise only)** agütsütsüla.

DESCRIPTION OF THE IMMOVABLE PROPERTY

All that part and parcel of Flat (2 BHK) having build up area 1581 Sq. Ft. bearing the Flat No. 6F-02 at First Floor, 6th Wing, Palm Springs Apartment under Property No. 6/2, Mestripalya Jakkasandra, 7th Cross, 16th Main 4th Block, Koramangala, Bangalore- 34 in the name of Mr. Impa Longkumer, already charged / mortgaged as securities to the Term Loan A/c No.133708451000006 and Continuing Security to another TL (Edu), A/c No. 133709011000043 at Bank of Baroda (Erstwhile Vijaya Bank) Jalahalli Branch, Bangalore.

Place: Bangalore
Date: 12.02.2021

Authorised Officer
Bank of Baroda



TIR YIMYIM YIMOBILEM (EDITORIAL)

DIMAPUR YANGTEPNÜ, TSÜKLAI (FEBRUARY) 18, 2021

MYANMAR SEPAITEM TASHI

Koba linük nung südirsüaka sepaitem ya yimsü asütsü atema masü saka tsükchir ket nungi linük kümzüka anüksü aser tashi mangartem azüoktsü asoshi shimtetba purtem lir. Iba jagiang, parnok nem prangpong injang amdaktsür aser süoshi aser chiyongsü teperi agüja parnok külemi tesem ka nung lidaktsür. Aji oda, sepaitem ya yimsü asütsü atema masü saka yimsüsür aser nübertem taküm aser rongsen kümzüka ayutsü atema shimtetba mitkartem lir. Ajisüaka, talisa Pakistan aser Myanmar lima ama nung mapang mapang shia sepaitemi nübertem election agia shimtetba yimsüsürtem atsüngdoker yimsü asüba angur. Aji oda, tanüa Myanmar nung election-bo agi aser vote-a tatem tashi zünga maparen ajak shitak atem saka election nung adokertem nem yimten tashi magütsüi nokdanga yur sepaitemiang yimsü asü tenzükogo. Myanmar nung sepaitemi yimten tashi agiadokba otsü ya tamalen Burma ta ajaba mapang, mezüngbubaji 1962 küm aser tanabubaji 1988 küm liasü. Iba sülen, National League for Democracy (NLD) lenir Aung San Suu Kyi-i anir nübertem shimtetba yimten ka lateta yimsü asütsü asoshi tasüa majem ola adokba menokdangteti 2008 küm Myanmar sepaitemi akümba yimteni parnoki aginüba ama linük temzüng yanglushir, 2010 küm election agitsü ayongzük saka NLD teloki shilem magi, kechiyong sepaitemi latetba linük temzüngji parnoki magizüktet. Iba temzüng tasenba nungj NLD teloki magizüktetba arla kaji, "Myanmar tirji shiba südir süaka, paji sepai mapa nung lidangba nisung asütsüla aser par apuani mesüra tanurtem shinga bendanger yimten kübok aliba mesüra bendanger linük nung senso kuma aliba nisung masütsüla," ta lateta alibaji liasü. Iba temzüng arla jagi election nung nübo agi abensaa adokyonga, Aung San Suu Kyi-bo tir mekümtetsü, kechiyong par jabaso ana London nung British senso kümer lir. Tetezü, la Myanmar nung tekolak mekümdaktsütsü nükjidong nung asaa dang sepaitemi linük temzüng nung iba arla ya enok ta angateter. Iba jagiang lai aniba teloki 2010 election nung shilem magii toktsü. Ajisüaka, US tir Barack Obamai Myanmar semdanga parnok ajak den ajurutepa sülen 2015 küm election agiba nungbo NLD teloki shilem agi aser takok tajung angu. Ano, election nung NLD ama nübertem akümba yimten teloki takok nguaka Myanmar sepaitem tatar senden nung karbosa alitsüsa akümbaji, 2008 küm latetba linük temzüng nungsa Myanmar tatar hoho nung tatar 664 nungi noklang nung 25 shilem (25%)bo sepaitem asoshi shiteta ayutsü ta alinungji sepaitem rongnung tatar 166 bosa tatar hoho nung alitsüsa maongka angur. Item ama temzüng arla kar nung tetsüdaktsü aliba agi, NLD teloki 2015 küm election nung takok nguaka, Aung San Suu Kyi tir mekümtet. Iba ama temzüng talenba kübok pei inyaknüsü meinyakteti küm pongo yimsüsüa arur, yaküm 2020 küm November ita nung election agiba nung NLD teloki tatar hoho nung tatar menden 664 nungi 80% dak tali ngua takok anguaka Myanmar sepaitemi election meshitaki agiogo ta aija taküm 2021 February ka nü yimten tashi rakzüka yua lir. Iba anogo nungi Myanmar lima mesüngjemteti anogo shia yimti yimdong nung nübertem adenshia longkak aita amongba asenoki angur aser angashir. Atangji, election timi agir yimten tashi magütsü rakzüka ayunungji, UN tongti ketdangseri anir UK, US, Australia aser European Union teloktemibo sashia aitsüogo aser nüboertem shimtetba yimsüsürtem nem yimten tashi meyipa agütsütsüla ta takangba agüja lir. Ajisüaka, ano külen China aser Russia-ibo Myanmar sepaitem mapa anemaji ola madokba dang masü saka UN Security Council dena ola madokdaksüi nokdanga lir. Iba ama kidanger yimten nung petsaperong adokba mapang, India-ia kechi ashir ta asüba kanga tongtibang asütsü. Atangji, India-ia Myanmar nung linük temzüng aser election agiba maparenji shitak mapa kuma inyaktsüla ta metetdaksüogo. Iba dakji alaka India-i tang tashi nung Myanmar sepaitemi yimten tashi agiadokba anema tangar kintemi ashiba amaji kanga sashia aijabo metetdakja mali. Ashiko, ibaji Indian-i Myanmar sepaitemji mejashidaktsünüba agi asütsüa akok, kechiyong India asoshi Myanmar sapaitem teyari ya kanga nüngdaker. Parnok teyari ajanga dang Myanmar nung jenoka yur India nem timtem agütsür teloktem aika takok ngua makdokba otsü asenoki angashir. Iba denji ano rongsen aser shishilembaba tsütsüa Myanmar ya India asoshi kanga tongtibang linük ka lir. Atangji, Chinai asema linük denbo India-i mejungtepnütsü saka Myanmar denbo India-i mejungtep maremtsü. Iba jagi, tang tangbo Myanmar sepaitem asoshi mulungsüngzük angudakji kidanger India ya ka lir. Myanmar sepaitemi Aung San Suu Kyi-i aniba telok NLD-i akümba yimteni linük temzüng melenshi nungbo ta tsübur alitsüa akok, ajisüaka, yimten tashi yabo nübertem ket nung dang alinungji, Myanmar nunga sepaitemi akhidang amabo talangka yimsü süa moutettsü.

OLEMSABANG

KHRISTAN TAMANG, LOKTI YANGLUSHIBA ASER LAIPUTI RATETYIM

~ Dr. Imsenperong

(Yashi adok nungi...)

Tanü Naga Nunger Laiputi Ratetyim aser Lokti taküm

Tanü asen lima nung tamangerbo onsara, tenlaki sünga amener saka mapa ajak nung teraksa (corruption) aser ochimashi (injustice) onsara. Teraksa aser ochimashi anema inyaktsübo toktsür tenlaki dang tasü ita item anema jembir mali. Teraksa anema nüngsen jembirbo onsara, saka item anema nokdakdangbo arogo tenzükerbo matentsüla ta dang nüburi angatet. Kar denra temenen mapa ama nüburtemi bilemer. Pu-nok amer lenmang nokdanga aliba süngji meleptokra kudasür lenmang ajangdanga otettsü? Tamanger kaji alima teraksa senzüka toktsür kotak lima dang pen-pua jajaba jagi Yisu sülen anitaker ka mesütet. Yisui mapa agi sayutsüngi asü. Pai Tsüngrem-o tenlaki nung dang masü, mapa agi jembir. Tenla kidang mapa tamajung inyaka lia tarepba lisü agi asangsang nung repzüka yok. Yimjak nung ajemrepba aliba pur yari aser kümzük.

Tanü asen lokti nung amangpetba yimya aika lir. Tamangbo amang saka tamanger mapabo meinyaktet, Yisubo ajuru saka Yisu tsüngsü nungbo mejajatet, Tsüngrem O-bo angashi saka tangashiba ama nisung o nung memeyipzükter, aser Lai o-bo ratetdang, saka tang aliba lima atema masü, manguba lima ka atema dang ratetet ta asüba tebilemtsü tensa ka nung lir. Lokti nung ochi shilem magitetbaji tayoker o talir na ajurutep ama, külen arogo nung tenzükeri shisa tesadem nung Lai tesayuba meratetter, aser kodang lokti yanglushiba tsütsü Lai tesayuba agütsüdir nüburtemi tai tesayuba ama bilemer. Yamaji tanü lokti teraksaali tajung nung süngdong atem ama injen ainer aser künü yipru mopung agi nungshia tera meküpa laotsü aser indangji ajak zükreptsü.

Asen lima nung tamangerbo jenti lir. Kar kotak len tenük yoker penzüdang, alima nung teyanglushitsü nungdakba mangur; kari pei kija tekümtet aser kija asoshi bilemdang loktiji nungdak mali ama senzüka toktsür; ano kari Tsüngrem sayatenya mapa nung rangloker mejimenu ajak nung sarasadem ki, tanela asüngsashi aser item amala mesükba dang penzüdang, koba alima nung takoktsü aser nisungi inyaktettsüsa lir ajia dena meinyaker. Tema tazütsü yimsümaparen kisüng inyakbajagi mesüra manguba aser tarutsü kotak senmang kisüng pen-puba jagi tamanger ka mekümtet. Tanü asen lokti yagi tamanger jenjang noksa lir. Sarasademer onsara, sentepi aor onsara, Tsüngrem o jembir onsara saka lokti temenen yanglushiba nung teka amoka inyaker mali. Teinyaker malibaji dang masü, inyakner atemaa lemanng melapoktsür ta asüba jenjang ka nung lir.

Nisungi Tsüngremji alima shi tenük agi mungutet mesüra meimchir tekolok agi-a tongtettsü makok, saka kongteraksa aser ochimashi anema nokdaker yangji Tsüngrem dena lir ta metetdi. Teraksa aser ochimashi anema inyakba nungbo, ibaboarogo tenzükeri inyaktsüla aser yabo lokti lenitemi anir inyaktsüla ta mali. Lokti temenen anema raraba nung tamanger-mamanger ta lemsa mali (Church and State). Ochi, temeim, yimjung aser putepdaktsüba nung ajemdaker lokti temenen anema nokdaktsüla.

Putu, tensa den peta Laiputiratettsü mapang ka lir. Laishiba azüngba tetezü Lai ojang züngyonga aobaji masü, aji pei taküm aser lokti nung benshia aser inyaktetba dangji dang Lai azüngba shitakba ta shitet. Laishiba anaben asemen züngma yonga Laishiba-i tuyuba ama melitetera aser meratetra aji amajok. Yisu Khrista teyongtsü südaktsür alima teraksa yanglushitsü apusodi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Bangladesh nung Tenla kidang auyaba anema Khristan temi longkak ait



Bangladesh kübok Lalmonirhat district nung aliba Emmanuel Arogo Tenla ki noksa nung angur.

Dhaka, February 17 (Agencies): February 10, 2021 nü Bangladesh kübok Lalmonirhat district nung Muslim nungertemi Emmanuel Arogo Tenla ki kakkoka tur auyaba sülen Khristan lenirtemi Khristan tem nem ochi temeden agüjang, ta takhangba agütsür.

February 10 nü Muslim nunger pezü motorbikes nung aruba sülen Lalmonirhat district kübok Aditmari nung aliba Emmanuel Arogo Tenla ki kakkoka auya, iba sülen February 14 nü Khristan temi district police station nung ken o ka benoka liasü.

Muslim nunger jagi Arogo indang signboard raksatsü aser Tenla ki kima süngdong lensüktüba sülen Tenla ki kishi kakkoka chair 30 aser atem nung alemba sü ana auyar ao; itemji Bangladesh nunger sen (taka) 14,000 shi jenjang lir, ta lenirtemi metetdaksü.

Pastor Lovlu S. Levy-i, pai local police station nung ken o agüja liasü saka iba tatalokba bushisüngdangtsü atema police-i kecha meinyak, ta metetdaksü.

Pastor Levy-isa, waz mahfil (Islamic senden) nung tesempa otem proker, aser iba nungji ajemdaker Muslim nungeri Khristan tem anema inyaker, ta

ashi.

Tamalen-a Muslim nungeri iba Arogo aiben amokmerenogo; 2015 küm nunga Muslim nungeri pa amokmerena liasü aser 2019 küm nunga pa Tenla kidangi aodang len tom nung Muslim nunger telok kati pa dak züka liasü, ta pastor-isa metetdaksü.

"Kü dak azükba mapang nungjagi ni tsübur. Ozü linük temzüng nung tamangba yimsü ajak sadoka amangtsü atema temeden agüja lir, ajisüaka telok kari iba temeden amokmerener. Waz mahfil nung minorities anema, talisa Khristan tem anema tesempa otem jembir, aser iba nungji ajemdaker Arogo anema inyaker," ta pastor-i ashi.

Iba Arogo nung züngsem 46 lir, aser Tenla ki amakba sülen nungi Khristan tem tsübuteper, ta pastor-i osangbener nem metetdaksü.

Ajisüaka Police-ibo iba tatalokbaji ali dak sendakba mangatettep ajanga lir, ta ashi.

Aditmari police station nung officer in-charge, Saiful Islam-i, "Iba tatalokbaji ali dak sendakba mapangtettep ajanga lir ta onoki angazükogo. Iba tesem nungji alirtemi ashiba agi, iba tesem nungji Tenla ki mali. Arogoi ali rakzüka agir. Sorkar documents nung iba tesem nungji Tenla ki

aliba mesüra tekülem sentong agiba indang shia mali," ta metetdaksü.

Bangladesh Christian Association (BCA)-ibo, police-i ashiba osangji shidak masü, ta metetdaksüogo.

Osangbener den jembidang BCA Tir, Nirmol Rozario-i, "Onoki iba Arogo aser pastor junga meteta lir. Yaküm-a Khristmas benjung matongdang onoki iba Arogo nungji züngsemtem nem blankets aser sen agüja liasü," ta metetdaksü.

"Iba tatalokba ya tanga kecha masü saka Islam yimsü alia amangertemi ambangyima inyakba mapa lir; parnoki Khristan tem amokmerentsü jangrar. Item tatalokba nokdangtsü atema sorkari aibelenertem nem temerenshi agütsütsüla," ta Rozario-i metetdaksü.

Bangladesh nung Muslim nunger nütsüng timba lir. 2013 küm nungi Islamic telungpurtemi secular ocet zülurtem, shisashirtem, bendangertem aser Hindu, Shia, Ahmadi Muslims aser Khristan lenirtem 50 dak tema tepsetogo.

Kasa mapang nungjisa Italy nunger Khristan putir ka densema Khristan putir pezü dak azük aser Khristan ana tepseta liasü.

Laos nung Khristan lenir ka khasetba ken o bushisüngdang masür



Hmong Khristan lenir, Cha Xiong noksa nung angur.

February 17, 2021: Ita ana tejaklen Laos kübok Luang Prabang province nung lisopur Hmong Khristan lenir, Cha Xiong kidangi meyipa aoba mapang nung nisung kati pa khaseta liasü, ajisüaka tang tashi aibelenerji mapu.

Buddhist communist linük nung Khristan tem kanga sendoker aser Khristan tem anema inyakba kanga bulua ataloker.

Osang angazükba agi, yimdak nisung ajaki arrshi küm 28 Khristan lenir, Cha Xiong ji kanga meima liasü, aser yimdak pa tsükchir maliasü.

Osangbener den jembidang yimdaklir kati, "Ni pa kanga

junga meteta liasü. Pa nisung kanga tajung aser pa majungba indang osang kodanga mangashidang," ta metetdaksü.

"Pa khasetbaji pa majungba ajangabo masütsü. Pa tanur pezü lir, saka tang nungibo pa kinüngtsüi dang tanur pezüprong reprangtsüsa akümtsü," ta paisa metetdaksü.

Yimdaklirtemi ashiba agi, December 13, 2020 aonung 9:00 ako meta Cha Xiong par farm nung mapa inyakba sülen motorcycle nung par kidangi meyipa aruba mapang nung mejangjaba nisung kati pa khaset.

Police ketdangser kati, "Pai Khristan yimsü proktsü

meranga liasü ta angateter, aser Khristan yimsü amangertem lenitsü atema pa nem khuret benlokja liasü," ta metetdaksü.

Laos yimtsüngtem nung Buddhist yimsü alia amangertemi aiben Khristan tem dak melung malemer, aser Khristan temi Laos sobaliba dang nungibo yimsü nung taliba rangloker, ta Khristan tem nem tai tongloktsür.

Communist linük nung ya Khristan yimsü ya colonialists aser missionary temi prokba bendanger yimsü ka lir ta züngshir.

Nütsüng million 7 aliba linük nung ya Khristan nütsüngbo 150,000 dang lir.

Khristan temi yimjak nung tekülem sentong agira parnok anema inyaker, ibayongji parnoki terabo mimshia tekülem sentong agir.

Yaküm-a yimtsüng balala nungi Khristan kibong aika pei kidang nungi mindoka liasü.

ANOGO ABEN TSÜNGREM DEN

MEJANGJABA TANELATEM

"Temeimbatem, nenoki tanela ajak dak tamang, saka tanelatem Tsüngrem nungi asü masü parnok tendangang; kechiaser tiyazü ainkar jenti alima nung adokogo" (1 Yn. 4:1).

Asentenshiba mapang arogo otsü nung memetetba mi jenti ajangshia aruogo. Mezüng tenyartemi iba mi asoshi tekümdangtsü shia aru. Kümdanga alitsü ashiba tetezü renema alitsü ashiba lir. Iba kuli nung ajemdaker parnoki sayutsüngi masüba tangar Yisu, tangar osangtajung aser tangar tanela Tsüngrem anema sayutsüngiba anema tekümdangtsü ashi (2 Kor. 11:4).

Tsüngrem tenzükertem dang nungi tiyazü tenzüker aser tiyazü tesayur timba liasü. Iba indang aika nung amshiba angur. 1 Yn. 2:18; 41; Mt. 7:15, 22, 25:5; 2 Kor. 2:17; Fil. 3:18. Au, tsükchirtemji tzümetsüng ama arur (Isa. 59:19). Tiyazü tenzükbaba mapa melen Yisui, "tsünglu" "tzümetsüng" aser "mopung" ta jembir (Mt. 7:15, 25). Pauli tiyazü tesayuba mopung agi minzütsü ta jembir (Ef. 4:14). Tanelatemi Tasen Lai arogo nung mashi tenzüker kar ajanga tenzüktsü akok (Ef. 4:11). 2 Korint 11:13 nung asenoki tiyazü tenyartem indang azünger. Tiyazü ainkartem (Mt. 7:15), tiyazü sayutsüngirtem (Gal. 1:6-8), tiyazü sannükertem (Yn. 10:12) aser tiyazü tesayurtem (2 Peter 2:1). Tatem anogo tonga arudang, tiyazü tanelatemi mapa tali inyaktsü. Iba indang Tanela Temeshi ajanga shin (1 Tim. 4:1). Mekümdangba tamangertem tamang nung pilatsü. Ibai ajungben pilaba masü saka mera ka sülen mera ka apunger aotsü.

Tenyartem ajaki tanela balala agi inyakba sayutsüngirtem anema kümdangdaksür. Item indang Pauli amshiba otemji reprangang. Tekülak inyakertem (2 Kor. 11:13), timtemdaksür (Gal. 1:7), tiyazü adianutem (Gal. 2:4), mashileni odaktsür (Gal. 3:1), azütem, tamajung inyakertem (Fil. 3:2), kangki tsükchirtem (Fil. 3:18), tekelokdaksür, amajok mapa (Kol. 2:4,8), mezümekümer (Kol. 2:8), anemsü (2 Tim. 2:16), asüküm nisung (2 Tim. 6:4), teraksa (2 Tim. 6:5), mojing sang nung apurtem (2 Tim. 2:26), temeyipoktsürtem (2 Tim. 3:13), amajok O jembirtem (Tit. 1:10), tim masüba sayurtem (Tit. 1:11), telemsateper (Tit. 3:10).

Tanü tesayuba balala aika Arogo nung adoker. Tanü Arogo, Khrista Temang asoshi tongtipangtiba sempetji, "Tangatetba Tanela" nüngdaker. Item indang asenoki anogo pezü pungu ka reprangtsü.

Sempet tajung aika agütsüsang Kotak Obala, tanela tajung, tamajung angatettsü sempet kü nem kua. Amen.

Congo linük nung Tenla ki ka rongdoktsü aser Khristan 16 tepset

February 17, 2021: Amongnü (February 14, 2021) Congo kübok Ituri province nung Islamic kiralongrartemi Catholic Khristan Tenla ki ka rongdoktsü aser Khristan 16 tepsetogo, ta International Christian Concern (ICC) osang ajanga metetdaksü.

Islamist kiralongrar telok-Allied Democratic Forces (ADF)-i amakba mapang nungjisa civilian 13 aser sepai asem kanga mejungi yirutsüogo.

Congo nung nütsüng shilem 85-90 bo Khristan tem lir, ajisüaka Islamic kiralongrartem kanga bulua adokba ajanga Khristan tem kanga takoksa angur.

Iba linük nung Khristan nütsüng kanga agia timba süaka alima nung Khristan tem reshikangshiba linük tamajungtiba 50 rongnung iba linük jenjang 40buba nung lir (2021 Open Doors World Watch List for Christian persecution).


Congo nung talisa anüdoklen telungpurtemi timtem agütsür; iba region nungji sorkar kanga tashimait, ta osang angazüker.

ADF kiralongrar dak sendakba nung Open Doors otongdar, Illia Djadi-i, "Islamic yimli ulutsü nükjidong nung Islamic kiralongrartemi nütsüng timba Khristan tem amaker," ta metetdaksü.

Paisa, "Item tatalokbatem anema inyaktsüla, kechiyong anüdoklen Congo nung anogo shia tai maket nisung jenti tepseter," ta metetdaksü.

Conggo nung takoksa angur Khristan tem atema maneni sarasademjang; Tsüngremi sorkar tashi itdaksütsü aser linük nung tesünep alitsü atema maneni sarasademjang; Arogo anema inyakertemi Yisu Khrista temeim jangjatsü atema manni sarasademjang, ta paisa mepishia metetdaksü.

OLONG PAITEP # 5728



TIPIEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

LANGTSÜNGLEN

1. _____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _____ kibur
13. Tebur tembar tsüngda
jatepba

OLONG PAITEP # 5727 TELANGZÜBA

TIPIEN :

1. Lemsä, 3. Osang, 5. Mezüng,
6. Agi, 7. Süra, 8. Tebutem,
9. Amen, 12. Odi, 13. Asayar,
14. Angsü, 15. Agima.

LANGTSÜNGLEN :

1. Lamen, 2. Sangken, 3. Omen,
4. Asüküm, 7. Sendong, 8. Tejang,
10. Tanga, 11. Tazü.



ALOKBA O TEBU NA

- Tebu** : Talakba na ya kechi inyaker?
Alokba : Oba ni kaküt azüngerä.
Tebu : Kaküt tali tezüngjai, khenkhenbo otsü atonga kazüangma.
Alokba : Kaküt azüngbaji tajanzük lir, knowledge kanga arener nung koda! Ni kar asüngdangdi ni?
Tebu : Chaloo.
Alokba : Nashi mamatzü kong ayu nungang meraksatsü?
Tebu : Ümmm, nai shiang.
Alokba : Hehehe, nashi tetsüla tepok nungi magizüki ayu nungang meraksatsü ati, ano ka asüngdangdi ni?
Tebu : Hang.
Alokba : Break fast nung mechitetba anaji kechisa?
Tebu : Aeeet, oda naisa shiang talak.
Alokba : Breakfast nung mechitetba anaji Lunch aser Dinner ati, hohahaha.
Tebu : Waaooo, my son Alokba!!

Lilir WhatsApp

TANÜBO NAI LANGZÜANG

Q. Tang India Corruption perception index (CPI) – 2020 rank kwi buba lir ?

[A] 50th [B] 75th [C] 80th [D] 86th

===== (Taruba adok nung onoki langzüksü)

YASHI ADOK TELANGZÜBA : 1975



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

2020 DECEMBER TASH ALIMA NUNG SEN JENJANG
TULUTIBA LINÜK 10 YAMAI :

1. Kuwaiti Dinar (KWD)
2. Bahraini Dinar (BHD)
3. Omani Rial (OMR)
4. Jordanian Dinar- JOD
5. British Pound (GBP)
6. Gibraltar Pound- GIP
7. Euro-EUR
8. Caymanian Dollar-KYD
9. Swiss Franc- CHF
10: United States Dollar: USD



SUDOKU # 5770

TELANGZUBA # 5769

	9	8	7		2		3	6	3	9	2	5	8	1	7	4	6
		5	6	9	8				6	4	5	9	3	7	2	1	8
2		4	1				7		1	7	8	2	6	4	3	9	5
8	4		5			6		3	4	1	3	7	2	5	8	6	9
9			4					8	2	8	6	4	9	3	1	5	7
	7	6					1	4	7	5	9	6	1	8	4	3	2
				1	3		6	5	8	6	7	3	4	9	5	2	1
3	1	2			6	4			9	3	1	8	5	2	6	7	4
	5		8	7		3	2		5	2	4	1	7	6	9	8	3

OJANG LUTEP # 5316

- RUTTASÜ :
AGOTNOEM :
EMATA :
MDAMEBILENGI :
MBIJEÄ :
AKRINYA :
YARUA :
IBALA :
ANEMJOGOTI :
MTSTEBILEÜ :

OJANG LUTEP TELANGZÜBA # 5315

YIMDEN TENZÜKBA MAPANG KECHI KOMA MELENSHIA
AOTSÜ SHINGAIA SHITETTSÜ MAKOK

TAN HOPTA ATEMA - KOMA SÜLA ?

Q. 1963 küm 1st December sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

Olong 20 shi nung February 19, 2021 tashi nung iba telangzüba ya onok dangi (e-mail - tirymyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tirymyim.in) ajanga yokang. Telangzübatemji taruba Honibarnü adoktsütsü.



Patna, February 17, 2021: Linük nung LPG aser petrol jenjang kanga atuba anema Bodhbarnü Patna nung RJD züngsemtemi Centre sorkar anema longkak aitba noksa nung angur.

S.Africa-i SII dang vaccine dose mn.1 meyipa agitsü metetdaksü

Bengaluru, February 17 (Agencies): South Africa linüki Serum Institute of India (SII) dang February ita tetenzüklen parnok dangi yokba coronavirus vaccine dose million kaji meyipa agiang ta metetdaksüogo.

Hopta ka tejaklen South Africa-i clinical trial ka agiba mapang nung coronavirus variant anema tekümzüka agütsüba jenjangji tera dang ta jangjaba agi iba vaccine program atsülanga liasü.

Taoba hopta South Africa-i parnok indang vaccination

programme nung SII indang AstraZeneca mamshii alitsü telemtetba agi.

Serum Institute of India-i AstraZeneca vaccine yanglur aser iba company ya vaccine supply asür tongti company rongnung ka lir.

Taoba hopta AstraZeneca indang vaccine dose million 1 South Africa tonga ao aser ano dose 500,000 shi hopta ishika tsüngda yoktsü sentong liasü.

South Africa health minister-i, linük nung clinical trail agiba mapang nung 501Y.V2 coronavirus variant

anema AstraZeneca indang vaccine ajanga tekümzüka agütsüba jenjangji tera dang asüba jangjaba sülen vaccination agitsü atsülanger ta metetdakja liasü.

South Africa nung iba study ji University of the Witwatersr aser Oxford University nati agia liasü.

Africa nung aliba linük nung ya COVID-19 vaccination program ano metenzük. Parnoki vaccination tenzüka Johnson & Johnson indang vaccine health workers nem tama agütsütsü.

March 4 nü Jaishankar-i Bangladesh semdangtsü

Dhaka/New Delhi, February 17 (Agencies): March 4, 2021 nü India External Affairs Minister (EAM), S. Jaishankar-i Bangladesh yimtiba, Dhaka semdangtsü aser iba mapang nungji March 26 nü Ato kilonser, Narendra Modi-i Bangladesh semdangtsü aliba atema sentong renemtsü, ta Bangladesh nungi ketdangser kati metetdaksü.

Jaishankar-i semdangba mapang nung pai Bangladesh Foreign Minister A.K. Abdul Momen den senden amentsü

aser pai Ato kilonser, Sheikh Hasina-a ajurutsüa akok.

Ato kilonser, Narendra Modi-i March 26 nungi anogo ananü Bangladesh semdangtsü aser iba mapang nungji pa Bangladesh nunger 50buba Independence Day sentong, Dhaka-New Delhi tesendaktep yanglur küm 50 ajungbamong aser Bangabandhu sor küm 100 ajungba benjungmong nung adentsü.

Ato kilonser anati linük ana dak sendakba senden amentsü aser iba mapang nungji energy aser communications

densema sector aika nung tezüngzüktep agitsü imlar.

December 17, 2020 nunga linük anaprong nungi Ato kilonser anati video conferencing ajanga senden mena liasü. Iba sülen Bangladesh Foreign Secretary, Masud Bin Momen-i January 27 nungi tenzüka anogo pezünü New Delhi semdanga India Foreign secretary, Harsh Vardhan Shringla den senden amen.

Yaküm August 18 nü Shringla-ia Dhaka semdanga Momen den senden mena liasü.



February 17, 2021 nü Srinagar nung bendanger ketdangsertemi Mayor Srinagar, DDC chairpersons, BDC chairpersons aser party balala nungi Municipal Council Chairpersons den senden amendang tangokba noksa nung angur. Jammu & Kashmir nung terenlok mapatem aser tensa asadangtsü atema bendanger ketdangsertemi J&K Union territory semdang.

Congress-i Punjab Municipal Elections nung takok junga angu

New Delhi, February 17 (Agencies): Bodhbarnü Congress party-i Punjab local body elections nung municipal corporations tenet nung takok nguogo.

Congress-i Moga, Hoshiarpur, Kapurthala, Abohar, Pathankot, Batala aser Bathinda nung takok angu aser party-i küm 53 sülen tang mezüng Bathinda municipal election nung takok angur. Mohali municipal election osangbo Brihostibarnü ang sangdongtsü.

Bathinda Lok Sabha menden nung tang Shiromani Akali Dal (SAD) nungi Harsimrat Badal lir. Aluyimba dak sendakba ozüngtem nung mangatettep adoka lai BJP den teloktep raksaa liasü.

Congress MLA aser state finance minister, Manpreet Singh Badal Bathinda urban assembly menden nungi lir, anungji municipal election nunga Congress-i iba menden nungi takok angubaji pa atema akhümket ka lir.

Municipal corporations tenet aser municipal council-Nagar panchayats 109 atema Bodhbar anepdang nungi vote azüng tenzüka liasü. Centre sorkari benokba aluyimba ozüng tasen asem anema tang aluyimertemi BJP-i aniba sorkar anema

longkak aitba mapang nung civic body elections nung tokteper tongti party pezüji Congress, Aam Aadmi Party (AAP), Shiromani Akali Dal aser BJP liasü.

Tang Punjab nung local body election osang ya aluyimba ozüng tasen asem onük nung nüburtemi obendang agütsüba election ka amai liasü.

Local body election nung candidates 9,222-i toktep. Candidates timtibaji independents liasü (2,832), iba sülen tanabuba jenjang nung Congress nungi candidates 2,037 liasü. BJP-ibo candidates 1,003 dang toktepdaksü aser Shiromani Akali Dal (SAD)-ia candidates 1,569 toktepdakja liasü.

Election osang sangdongba sülen Punjab Chief Minister, Amarinder Singh-i, Congress party-i state municipal election nung takok angubaji sorkari terenlok mapatem inyakba agi dang masü saka opposition parties- SAD, AAP aser BJP indang nüburtem anemba asalentong balala magizükba ajanga lir, ta metetdaksü.

Paisa, nüburtemi telemsa adokdaksüba, democratic masüba, linük temzüng alema inyakba aser party asem indang asalentongtem sendokogo, ta ashi.

Puducherry UT nung Kiran Bedi LG menden nungi anentsüogo



Bedi aser Narayanasamy na ya mapang talangka nungi onük aika nung meputepi arur.

Retired IPS officer, Kiran Bedi-i Mongolbar aonung tashi office mapa inyaka liasü aser lai Puducherry nung coronavirus vaccination mapatong asadanga police force aser sanitation workers frontline worker category nung züngsema vaccine agitsü atema tetuyuba agüja liasü.

Ano MLA ka anenba sülen opposition-i maongka agia Narayanasamy dang ner sorkar minority kümogo anungji nai menden nungi anentsüla, ta pa nem takhangba agütsüdar.

Ajisüaka Narayanasamy-i tang tashi assembly nung par sorkar 'majority' lir, ta ashir.

Taruba ita ishika tsüngda UT nung election agitsü.

MLA pezü anenba sülen züngsem 33 aliba assembly nung Congress züngsem 10 dang kümogo. Congress den teloktep DMK MLA asem aser independent MLA katia Congress nungiter. Assembly nung opposition MLA 14 lir.

Congress-i, Kiran Bedi-i sorkar inyakyim ajak nokdang aser tetsükdaksü agtsür ta aiaben ai tonglokja aruogo. Taoba hopta nunga Narayanasamy aser Malladi Krishna Rao na New Delhi-i oa Tir, Ram Nath Kovind dang Kiran Bedi Lieutenant Governor menden nungi anenjang ta takhangba agüja liasü.

New Delhi, February 17 (Agencies): Linük Tiri Kiran Bedi Puducherry nung Lieutenant Governor (LG) menden nungi anentsüogo.

Union Territory Puducherry nung ano MLA ka anenba ajanga V Narayanasamy-i aniba sorkar minority akümba sülen la LG menden nungi anentsür.

"Linük Tiri Bedi-i Puducherry Lieutenant-Governor menden nungi anentsüla ta tetuyuba agüja liasü," ta Rashtrapati Bhavan otongdar, Ajay Kumar Singh-i sangdong ka nung metetdaksü.

Tir, Ram Nath Kovind-i Puducherry LG menden repa abentsü atema Telangana Angh, Tamilisai Soundararajan nem mapa nungloksüogo.

Mongolbarnü-a MLA kati party toktsüba ajanga Congress-i aniba sorkar minority akümba sülen Tiri Bedi LG menden nungi agiener.

Yangon nung longkak aitba ajanga gari marakzüteti akum



Myanmar nung mitkartemi tashiyim amshia sorkar atsüngdokba anema Yangon yimti nung nüburttem longkak aitba mapang tangokba noksa nung angur.

Yangon, Tsüklai/February 17 (Agencies): Myanmar nung azüdokshi alitsü tsüba aliba mapang mitkartemi sorkar atsüngdokba anema yimti tulutem nung nüburttemi longkak aita liasü.

February 1 nü mitkartemi tashiyim agi sorkar atsüngdokba sülen Bodhbarnü longkak aitba ya tulutiba liasü. Civilian lenir Aung San Suu Kyi aser lar National League for Democracy (NLD) telok dang nungi tashi rakzüksü telemteba agiba nung nüburttem dena lir, ta mitkartemi jembiba aitsütsü mechi nüburttem temai adoka longkak aittsü ayongzükba ama Bodhbarnü sayutetogo.

"Asenoki democracy meimer aser mitkari yimsü asüba sempar. Mitkartemi tashiyim amshia sorkar atsüngdokba ajangshiba putu asenok tatembangba asütsü," ta elected NLD züngsem Sithu Maung-i Yangon yimtiba nung longkak aitba tesem tiyongtsü, Sule Pagoda nung nisung meyerijang aika dang ashi.

Nübür timbai imlaba ama November 8 election nung NLD teloki takok tulu angu, saka yangji ashikülak mapa liasü, ta army temi tai tongloksür. Mongulbarnü osangbener senden ka nung jembiba mapang tang yimsü tesüdak council indang odongtar, Brigadier General Zaw Min Tun-i, constitution nung mela aliba ama mitkartemi sorkar tashi agizük aser democracy atema inyaker, ta ashi.

Lintük nung nütsüng yongsük million 53 aliba nungi nisung million 40-i mitkar mapa busemer, ta pai ashi.

Yangon nung nüburttem temai adoka longkak aitba ya iba yimti nung tulutiba ama liasü. Lokti tulu adenshiba den külemi nisung kari yimtung aser tongtipang lemjem nung gari anena bonnet lapoka gari ajunga raksaba amai sayua security forces nokdanga liasü.

Myanmar yimtiba,

Naypyitaw nung private bank nung inyaker aser engineer tem densema nisung meyerijang aika adenshia lenmang nung jaja aser parnoki Aung San Suu Kyi aser Tir Win Myint chiokang, ta ayimtena liasü.

Mandalay nunga longkak aiterem temai adok, kong Hombarnü security forces temi longkak aiter 1,000 shi dak prangbong tuloktsü aser iba sülen lijak agi akha aser süng agi züka merenshia liasü.

Küm ter tejakdang democracy dangi memelen tashi Myanmar mitkartemi küm aika azüdokshia yimsü süa aruba otsü lir.

Armed forces tekolakba Min Aung Hlaing, shiba lenisüba kübok sorkar atsüngdok, pai 2017 küm anüolen tsütsü Rakhine state nung Rohingya nung anema apuso, koba kin ajunga okshia samatsütsü tebilemba nung inyaker, ta United Nations-i shia lir.

"Sepaitem aser injang-bomb agi raksatsütsü makokba garitem tali arua police nungiter, aser mitkar lenirtemi taochi mesayura, taoba mapang ama mela mela azüdokshi alitsü," ta International Crisis Group ajanga Bodhbarnü sangdong ka nung ashi.

February 1 nü mitkartemi sorkar atsüngdokba ajanga Myanmar nung democracy tsütsü tanemi renloka aoba ajungbena anendaktsü, kong November election nung Aung San Suu Kyi'er NLD ajanga takok tulu nguteter küm pongu kümsük tanabuba tenzüktsü liasü.

Mitkartemi election agitsü kuli agütsür aser takok angur nem tashi agütsütsü, ta Mongulbarnü osangbener senden nung Zaw Min Tun-i ashi. Pai election agitsü mapang mashi saka mitkartemi mapang talangkabo yimsü masütsü, ta ashi.

Mitkartemi Myanmar nung century tesadang ka jungnua yimsü sür 2011 küm democratic

reforms tenzük.

1990 küm mitkartemi election agi, saka iba mapang tasen tentetba NLD ajanga takok anguba sülen iba election result agizüktsü memolung.

Parnoki 1988 küm longkak aiter anema tashiyim amshia liasü aser ano 2007 küm totzü jenjang tali akumba ajanga nüburttemi longkak aitba mapanga tashiyim amshia liasü.

Arishi küm 75 tain Aung San Suu Kyi ka kidang shibanga lir, ta amanger aser election mapang COVID-19 ozüing nung aibelena nübuyiba atema National Disaster Management Law kübok la anema ken o benoka lir. Lar kidang ngutetba walkie-talkie ya ozüing alema bendang lima nungi bener arua amshi, ta ken o benoka lir.

New Zealand sepaitem küm 20 sülen Afghan yutsür aotsü

Wellington, Tsüklai/February 17 (Agencies): New Zealand-i par sepaitem Afghanistan nung anünga alirtem May ita tashinung anizüker aotsü, ta sangdonga küm 20 tashi iba linük nung aliba sepaitem meyipa aotsü lir.

Ato Kilonser Jacinda Ardern-i Bodhbarnü ashiba agi, Afghanistan linük telungzük nung yimjung maparen inyakba ajanga timtem ajurua aliba linük nung yimtenren tsütsü tangatetep kati arur ta teimla sayur, anungji New Zealand Defence Force (NZDF) menungdaki kumogo.

"Afghanistan nung NZDF küm 20 aliba sülen joko asen sepaitem yokba tatem kati arutsü mapang tongogo," ta lai sangdong ka nung ashi.

"Afghanistan nung asen sepaitem yoka aliba ya asen puti otsü nung talangtiba ka lir."

2001 küm US-i anir amakba mapang Afghanistan nung New Zealand-i defence aser danga agency züngsem 3,500 dak tema yoka liasü.

Ajisüaka yangji sepaitem yoka aliba tajemba kuma arur.

Tang yangji sepaitem trok anünga lir - asem Afghanistan

Nigeria nung telungpuri kaketshir pua bener ao

Abuja, Tsüklai/February 17 (Agencies): Prangbong bena alirtemi central Nigeria nung Niger state kübok secondary school ka nung azünger tanurtem pua bener ao, aser tang tashi nisung kwi pua bener ao, aji mejangjateter, ta ketdangsürtemi ashi.

Niger State government secretary, Ibrahim Matane-i osangbener dang ashiba agi, prangbong bena alirtemi Bodhbarnep 3:00 ako (par mapang) meta Nigeria yimtiba Abuja nungi kilometer 260 shi pilar Kagara nung aliba Government Science College amak.

Lendong agütsürtem ya mitkar indang uniform aser mask agir iba school indang hostel lungbanga tanurtem pua bener ao, aser iba mapang tanur karbo jena ao, ta osang ajanga ashi. Iba Government Science College nungya tanur meyerijang ka shi lir.

Samar aliba tanurtem tejanga metettsü mechi school ketdangsürtemi tanurtem tekolak züngdang tenzükogo.

Tang tashi ketdangsürtem nungi osang sangdonga mali, saka taoba mapang Senate züngsem Shehu Sani-i iba tatalokba indang tweet asü aser iba mapang school nung inyaker kinungtsütema pua bener ao, ta ashi.

Tang tashi telok kati tenüing agia mali.

Niger state kübok Zungeru jila anasa commercial bus ka nungi nisung 20 dak tema pua bener aoba indang video ka telungpur temi sayur ghonda ishika lir iba lendong ya atalok.

December ita nunga Katsina state nung tebur kisüing azüingba school ka nungi kaketshir noklang dak tema pua bener oa liasü, aser iba tenüing ya Boko Haram telungpuri agi.

Anogo ishika pua yur school tanur 300 shi chioka liasü.

Boko Haram aser par dak nungi jakzüka aoba Islamic State in West Africa Province (ISWAP) temi linük northeast tsütsü aser anasa aliba Cameroon, Chad aser Niger linüktem nung küm ter dak tema azüdokshia arur.



Hungary-i China indang Sinopharm COVID-19 mozü alizükba mezüing batch Budapest, Hungary nung aliba Liszt Ferenc International Airport nung ketdangsürtemi February 16, 2021 nü agizükba noksa nung angur.

National Army Officer Academy den aser asem NATO Resolute Support Mission Headquarters nung lir. Sepaitem yoka aliba maparen tembangtsü onük ya külemi inyaker tongtipang linüktem den jembio, ta Ardern indang sangdong nung shia lir.

Sepaitem anir aruaka Auckland-i Afghan yimjung maparen nung maneni yaritsü, ta Foreign Affairs Minister Nanaia Mahuta-i ashi.

"Afghan nung tsüngta yimjung maparen inyakba nung densema New Zealand-i Afghan sorkar aser par nüburttem den maneni yariteptsü."

New Zealand sepaitem teyari ajanga linük nung tang tensa ya adokdaksü, ta Defence Minister Peeni Henare-ia ashi.

"Asenoki regional security nung yari, aser Afghanistan nüburttem, talisa Bamiyan nung nung alirtem takum jenjang tajungba kumdaaktsüba nung yari."

Ajisüaka New Zealand-i rara agi raksatsür aliba linüki sepaitem yokba nung mangatetep kar liasü.

Küm ter tejakdang

Afghanistan nung special forces temi amakba mapang civilian asüba indang osang tiazü shia ary, ta taoba küm New Zealand nung bushisüngdang temi nguteta liasü.

Operation Burnham ya New Zealand sepaitem aser allied forces temi Afghanistan indang Tirgiran Valley nung August 21-22, 2010 nung agia liasü. Iba operation nung civilian asüba indang kaket ka adokba sülen 2018 küm bushisüngdang tenzük.

Kiwi sepaitem ya timba Bamiyan Province lir aser yangji küm 20 tsüngta sepaitem 10 takum samaogo.

Mapang shidakbaji maru tashi Afghanistan nungi alliance ajanga sepaitem anizüker maotsü, ta NATO Secretary-General Jens Stoltenberg-i hopta tetenzüklen ashi.

Taoba küm Washington-i May ita tashinung US sepaitem ajunga anizüker aotsü atema tenzüngzüktep ka Taliban den yanglu aser iba melen Taliban-i security guarantees agütsütsü, saka azüdokshi tali akumba ajanga Tir Joe Biden indang administration ajanga tensa asadanger.

Mon DPDB senden nung Dept inyakyim metetdaksü



Dimapur, Tsüklai/February 17 (TYO): Mon District Planning & Development Board (DPDB) senden February 16 nü DC Mon Thavaseelan K, IAS lenisüba kübok DC office Conference Room nung menogo. Senden tetenzüki tawa asüba ADC, Tobu Mudongoyi Chuzho, NCS nem akhüm tetushi agütsüba mapang tatsüka agi.

Senden nung onüktem rongnung Nagaland kübok District HQ ajak nung public parks yanglutsüba aser GHSS, Mon nung Mathematics aser Science tesayur agi anüngba densema liasü. Mon nung public park yanglutsüba onük sensaksemba mapang KNSK leniri board dang park atema Mon nung Fishery tesem shimtsü shidang. Board-i tesem tapet ka shimtsü atema takaratiba nung NGO aser Tribal Hoho tem den senden ka ametsü telemtetba agi.

GHSS Mon nung tesayur agi anüngba onük benoka sensaksemba mapang, board-i school tenüng nung senden nung arua adener dang, iba ken o ya takaratiba nung Principal Director School Education Department dangi abentsü ta tenantgzükba agütsü.

Kasa mapang nung SDO PHED Mon, Atoka Jakha-i, NLCPR projects ana densema PHED Department Mon

inyakyimtem indang power point presentation ka agütsü.

NLCPR projects ana dak sendakba nung mezüngbuba project kübok Mon aser kidanger yimtsüng pezü nem water supply agütsütsü. Project kübok civil structure 100% tembanga inyakogo aser pipelines atsüba maparen shilem 15 tembanga inyakogo, ta pai ashi.

Tanabuba project kübok Aboi Hq aser Longching EAC Hq nem water supply agütsütsü. Project kübok civil structure 100% tembanga inyakogo aser pipelines atsüba maparen shilem 70 tembanga inyakogo, ta paisa metetdaksü.

Atoka-isa, Jeevan Mission (2019-2020) funded projects, kong yimtsüng teku densema lir, iba dak sendakba nung Department inyakyim indang board nem metetdaksü. Paisa, board nem Mon jila nung tang water supply jenjang metetdaksü aser ashiba agi source pezü nungi anogo nung liter lakh 5.4 atsür. Ajisüaka national average dak ajemdaker inyakra jila atema anogo nung tzü liter lakh 23 nungdaksü, ta ashi. Demand aser supply na tsüngda tawa aliba süngdaksütsü atema Department-i tzü source pongububa atema benokdangogo aser iba ajanga anogo nung tzü liter 5.4 agütsütsü, ta Atoka-i ashi.

Senden nungsa Assistant Urban Development Officer (AUDO), Y. Kunyangse-i, Urban Development department inyakyim balala indang power point presentation ka agütsü. Inyakyimtem rongnung National Urban Livelihood Mission kübok Self Help Groups 15 tentetsüba, training ajanga tetsür 26 aser tebur 24 mapa nung aniokba, PM SVANidhi kübok beneficiaries tenet nem angati loan sen 10000 agütsüba, Urban Infrastructure Development Scheme (State Plan) dak sendakba nung maparen balala, kong Mon nem sen lakh 10 aser Tobu nem sen lakh 5 agütsüba densema lir.

Kunyangse-isa, Patient Attendant Lodge ka yangluba indang metetdaksü, koba ali kibur dak sendakba nung mangatetep adoka bangdaker lir, ta ashi. Paisa, board züngsem aser NGO ajak dang iba ken o takaratiba nung bentetsü atema shisatsü lemsateptsü mepeshi, kechiyong iba project ya nüburtem ajanzüksü atema lir.

Maneni Kunyangse-i, Mon jila nung sen crore 5.8 intoka lenmang pezü ajungketba indang metetdaksü.

Corporate Social Responsibility (CSR) ajanga yoktsü atema district nung terenlok maparen tongtibangtem indang board-i semsaksema liasü.

Urban Development Officer Tuensang-i metetdaksür

Dimapur, Tsüklai/February 17 (TYO): Urban Development Officer & Secretary, DUDA, Tuensang, Wachusie Katiry-i sangdong ka ajanga 29/01/2021 nü metetdaksüba ama mesüi, 2021 küm atema National Urban Livelihood Mission (NULM) kübok Self Employment Programme (SEP) benoktsü asoshi mapanglem melenshiba metetdaksüogo. Ajita asünung

dang langa aliba beneficiarie tem nem mapang aser maangka peria agütsütsü, ta ashi.

Sentong agiba mapang beneficiaries ajak dang sorkari mapang shia agütsüba SOP sülen tashi angaa anidaksü aser inyakyim ajak tetsüngda ita inyaksangshitsü metetdaksüogo.

1. Application forms February 23, 2021 tashi agütsütsü.
2. Form tem February 25, 2021 nü tashi nung benoktsüla.

3. Teshimtetbapurtem interview March 2 aser 3 nü 10:30 ako nungi 4:00 ako tashi ADC indang Office Chamber nung agütsü.
4. Interview ajanga shimba beneficiarie temi tenüngdakba kuli kaketttem ajak March 31, 2021 tashi nungbo benoktsüla.
5. Bank nem Project Reports April ita mezüngbuba hopta tashi nungbo agütsütsüla.

SDG ajangtetsü atema jenjang agir

Dimapur, Tsüklai/February 17 (TYO): SDG Coordination Centre (SDGCC), Planning & Coordination Department-i, tekübokba jenjang nung SDG ajangtetsü atema teyari agütsütsü asoshi innovative projects tilatem benokba ajungkettsü atema "Sustainable Development Goal (SDG)

Innovation Participatory Action Research Initiative" ka asatetogo.

Iba sentong ya nüburtem inyakyim ajungkettsü atema sorkar shilem jangjatsü nükjidong nung tenzük. Innovative project tajungtiba asem nem sen lakh anana agütsütsü.

SDGCC, Planning & Coordination Department-i, "SDG Innovation Participatory Action Research Initiative" atema apply asütsü asoshi jika aser loktitem nem February 18 nungi March 12 nü tashi mapang agütsüogo. Osang tejangja agütsü atema <https://bit.ly/SDGinnovation-i> login sütettsü.

MENUNGRA BILEMTETER



26.06.1990 - 18.02.2020

Onoki meima aliba jala **Mrs. Yangertula Lkr**, nai onok toktsür oer tanü küm ka ajungba anogo nung na bilemteter. Na onok mulungjang nung teti lir aser Tsüngrem meim agi asenok kodanga mepiladaksür. Teti tatem makadak ajurutsü onok sarasadem.

Temeim jabaso, oja, oba, oti, oya, medemer aser kinüngertem.

Sür Küm Ka Ajungba Anogo Lt.Mokoknüksang Lemtur (Mopungchuket)



21:10:1921 - 18:02:2020.

*Tanü onoki na meima bilemteter,
saka ibaji tanü tase masü.
Onok mulung nung nü temeim teti lir.
Ola madoki teti onoki na bilemer,
Aser teti onoki nü tenüng tetshir.
Joko, onok akaba ajak agi,
nü den külemi aliba otsütem,
aser frame nung nü noksa dang lir.
Taküm nung nü den külemi aliba anogotem to,
Onok asoshi teti bilemtettsüba mapatem kümogo,
aser ibaji kodanga onok nungi mepilatsü.
Tsüngremi Pa den na lidaksür,
aser onok mulung nung na teti lir.
- Temeim kinüngertem.*

OFFICE OF THE YAONGYIMSEN SENSO TELONGJEM DIMAPUR DIMAPUR - 797112, NAGALAND.

TENUNGSANG AGÜTSÜR

Er.P.I.Imna Ao, Deputy Chief Engineer nungi Addl. Chief Engineer, PWD (R & B) jenjang tashi promotion tua konang nüngsang tulu bener aruba atema Yaongyimsen Senso Telongjem Dimapur-i pa nem tenüngsang aser tetushi tulu agütsür.

Tsüngremi na aser nür kibong taküm wadang nung ano maneni, nüboritem asoshi, tarutsü mapang nunga moajang ta sensosanger ajaki sarasademtsür.

**Sd/-
LATONG IMSONG.
President, YSTD.**

**Sd/-
I. MEYI LKR
Gen. Secretary, YSTD.**

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam contact no. 7627917983 / 7627998690 Address: Near Nagaland Gate, Lahorijan K/A Assam,** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM (Friday & Sunday only)**
Yours sincerely - Rashatemjen Add: Supply Colony, Dimapur



AO: Karolina, Brady aser Medvedev semifinal-i iogo

Tsüklai/February 17, 2021 (Agencies): Bodhbarnü Australia Open tetsür kija asaya quarterfinals nung No. 25-seeded Karolina Muchova-i 1-6, 6-3, 6-2 agi top-ranked Ash Barty tsükdaktsüogo.

Muchova tang mezügbuba Grand Slam semifinal ka nung asayatsü jenjang ngutetogo. Chris O'Neil-i 1978 küm Melbourne nung takok anguba sülen Australia tsürtem rongnungi iba asayamung mezügbuba akoktsü asoshi Barty merangdanga aliba tamakok nung tembangogo.

Quarterfinal asaya nung Muchova-i junga masayateti tenzük aser Barty 5-0 agi tejakdang aküm. Game teku asayaba sülen Muchova-i winner ka dang ngutet aser unforced errors-bo 18 mena.

Tanabuba set nung Muchova-i injury timeout ka

mesha minute 10 shi la temang anepaluba sülen la meyipa ait aser iba sülen tajungba asayateta liasü.

Barty den asayaba mapang lai la indang groundstrokes tem jelia asaya aser Barty shiba baseline nung lua asayadakja liasü, lai shot asayatsü atema telemtetba junga magiteti aibelen mena.

Asaya nung Muchova-i game teku nungi ti akok. Barty-i tatembangbuba set ana nung unforced errors 37 mena aser serve pezüben tashi opeta liasü. Tetsür kija asaya nungsa Jennifer Brady-i külem America tsür Jessica Pegula koka Australian Open semi-final nung Karolina Muchova den asayatsü atema jenjang ngutetogo.

22nd seed asayar yagi 4-6, 6-2, 6-1 agi Pegula madak takok angu.

Australia-i aruba sülen anogo 14 quarantine sūdaktsüba tetsürtem rongnung Brady kija anunga lir.

Kasa asayamung tebur kija asaya nung Daniil Medvedev-i külem Russia nunger asayar Andrey Rublev koka semifinal tongtetogo.

Mongolbarnü quarter final asaya nung Medvedev 7-5, 6-3, 6-2 agi Rublev madak takok ngua tang tashi nung asaya 19buba atonga kokogo.

Pa tang mezügbuba Australia Open semi final-i iogo aser 2019 US Open final-i aiba den 2020 küma semifinal tonga asayaba sülen Grand Slam kabosa akoktsü ana nung lir.

Pa taruba asaya Greek nunger asayar Stefanos Tsitsipas den asayatsü shibai arishi küm 34 tain Spain nunger asayar Rafael Nadal 3-6 2-6 7-6 (4) 6-4 7-5 agi kokogo.

Faf du Plessis Test asaya nungi anener



Tsüklai/February 17, 2021 (Agencies): South Africa nunger asayar tejen Faf du Plessis-i, Test cricket asaya nungi anentsü telemtetba agiba sangdongogo. Bodhbarnü Test asaya nungi anentsü telemtetba agiba sangdongoba mapang Du Plessis-i, pa taruba küm ana atema ODI aser T20 nung temulung agüja asayaner, ta ashi.

"Kü telemtetba kanga tejangja aser chapter tasen ka tenzükshitsü atema tang mapang tetemjen lir," ta Du Plessis-i Instagram post ka ajanga lemsatep.

Du Plessis-i Test asaya nung captain mapa 2016 küm belenzük aser asaya 36 sülen taoba küm January ita belenzüka toktsü. Taoba küm pai Sri Lanka den asayaba mapang run 199 yanglur tembang koba Test asaya nung pai yangluba run timtiba asütsü.

Test asaya nung pai run 4163 yangluogo, kong century 10 aser half century 21 densema lir.

"Küm 15 tejakdang nisung kari danga na South Africa team nungi Test 69 asayatsü aser captain mapa dena abentsü ta shira ni mamangla. Iba amala Test career ka asoshi ni kanga pelar, koba temoatsü agi sünga liasü," ta Du Plessis-i ashi.

Paisa, "taruba küm ana ya T20 WC küm lir. Ibayongji ni iba format nung rangloker asayaner aser asayar tajungtiba ka akümstsü asoshi akokba tashi alima ajunga nung asayaa senzünner.

"Iba formate nung Proteas nem meyipa agütsütsü aika anunga lir ta ni bilemer. Iba tetezü ODI cricket bo sentoka toktsür ta masü. Ni T20 cricket ya mapang tatsüka atema tongtibangtiba kümdaktsürba dang," ta pai ashi.

Kerala Blasters-i Coach Kibu Vicuna mapanungi anentsü

Tsüklai/February 17, 2021 (Agencies): Indian Super League (ISL) club Kerala Blasters-i Bodhbarnü head coach Kibu Vicuna mapanungi anentsüogo. Hyderabad FC den asaya 4-0 agi makokba sülen parnoki iba jenjang agi.

KBFC-i, iba season Kibu-i asoshi ajangzüksübatem atema pa dang kanga pelaba lemsatepba den tarutsü nung pa mapatem takok nung aotsü imlaja ataba lemsatepa liasü, ta Kerala Blasters-i sangdong ka ajanga metetdaktsü.

Assistant Coach Ishfaq Ahmed-i, teti asoshi coach ka mangu tashi khen atema coach mapa belenzüka atatsü.

"Tia maka iba season ya balaka aser imla maliba ka lir. Kü tsürapuri ni kechi mapa inyakdir inyakaka bendanga agüja inyaksü sayu anungji ni bendanga agüja inyaker,

ajisüaka ni jenbotsü atema lenmang kecha mebushir. Ni management, asayartem, coaching staff aser club nung züngsem ajak dang parnok professionalism aser temeim asoshi kanga pelar. Talisa ni Kerala Blasters fans tem dang kanga pelar, shirnoki mezügbuba anogo nungi tatembang tashi kanga nongita aruogo. Nenok ajak aser club tarutsü tajungba ka asoshi imlaja atar. Takok asoshi nenok langa lir," ta Kibu-i ashi.

"Kibu-i iba telemtetba angatetba atema ni pa dang kanga pelar. Iba season tajungba akümstsü atema nükjidadang tejangja ayu. Ajisüaka tiamaka onoki imlaba ama result mangur. Pai club atema bendang agüja inyakba atema kanga pelar aser tarutsü nung takok asoshi imlatsür," ta Sporting Director, Kerala Blasters FC, Karolis

Skinkys-i ashi.

Kerala Blasters puri asaya 18 sülen tang tashi nung point 16 dang nguteta lir aser parnok tang jenjang 10buba nung lir. Parnoki asaya asem kokogo, asaya tenet kasasa nung tembang aser asaya ti mekoki lir. Blasters pur defense takümsa tamajungba aser parnok tang tashi nung goal 33 chia lir aser attacker temi goal 22 dang idakja lir. Kerala aser Odisha FC nati dang goal 25 dak tema chia lir.

Season metenzük tsüngda taoba coach Eelco Schattorie den pilaba sülen Kerala Blasters-i Vicuna aniok. Vicuna-i taoba season Mohun Bagan den külemi I-League title benogo, ajisüaka club ATK den longjema ATK Mohun Bagan akümbsa sülen pa toktsü, koba Antonio Habas lenisüba kübok asayadar aser tang table nung temaba jenjang nung lir.



BUREAU OF ENERGY EFFICIENCY

(A statutory body under Ministry of Power, Government of India)

4th Floor, Sewa Bhawan, R.K. Puram, New Delhi-110066 (INDIA)

Website : www.beeindia.gov.in, Ph: 011-26766700

METETDAKTSÜR

M/s. Ajanta India Limited purtemi LED bulbs temelaba melii BEE Star Rating label ayoker ta metetogo, ibaji Energy Conservation Act read with the provisions of Regulation No.BEE/S&L/LED/2017-18/ Dated 28th December 2017 kübok Section 14 anema aibelenba maps ka lir, Bureau of Energy Efficiency (BEE)-i M/S.Ajanta India Limited nem LED bulb model kecha nunga Star Label amshitsü melaa mali ta tamshirtem ajak nem metetdaktsür.

M/S. Ajanta India Limited dang item osettem ajakji shishilemdak nungi meyipa agitsü aser item ama osettemji mayoktsü metetdaktsüogo.

DAVP 34106/13/0015/2021

Secretary

Always check for the authenticity of Star Label while purchasing a BEE Star Labelled Product.

davp 34106/13/0015/2021



BCCI-i tanungba Test asaya ana atema asayartem sangdongogo

Tsüklai/February 17, 2021 (Agencies): Mongolbarnü 2buba Test nung Joe Root-i aniba England team koka series 1-1 akümbsa sülen, tanungba Test asaya ana atema India team nungi asayartem sangdongogo. Linük ana tsüngda Ahmedabad nung tasembuba Test asaya medenzük tsüngda Umesh Yadav team nung adentsü aser pai Shardul Thakur melentsü, shiba Vijay Hazare Trophy atema yokogo.

Board of Control for Cricket in India (BCCI)-i, pacer Umesh temang tendangba sülen team nung adentsü ta ashi. Umesh tetsüng yiruba ajanga mezügbuba Test asaya ana atema meshim. Kasa mapang nung Abhimanyu Easwaran, Shahbaz Nadeem, aser Priyank Panchal nungera Vijay Hazare Trophy atema yokogo.

India nunger pacer-sa Mohammed Shami team nung züngoksemtü ta jembia aruogo, ajisüaka pa 3buba aser 4buba Test atema meshim, koba tawa yangluba Sardar Patel Stadium, Ahmedabad nung asayatsü. Indian team management-i, Shami aser

Navdeep Saini na dang Vijay Hazare tournament nung shilem magitsü atema metetdaktsüogo.

Maneni asayartem rongnung all-rounder Axar Patel maneni tanungba asaya atema shimogo. Chepauk nung 2buba Test nung shilem agiba ya pa asoshi India team nungi mezügbuba Test asaya liasü. Pacer Mohammed Siraj aser spinner Kuldeep Yadav na den Hardik Pandya, Mayank Agarwal, aser Washington Sundar nungera tanung asaya ana atema India team nung züngoksemogo.

Team India squad - Virat Kohli (Capt), Rohit Sharma, Mayank Agarwal, Shubman Gill, Cheteshwar Pujara, Ajinkya Rahane (vc), KL Rahul, Hardik Pandya, Rishabh Pant (wk), Wriddhiman Saha (wk), R Ashwin, Kuldeep Yadav, Axar Patel, Washington Sundar, Ishant Sharma, Jasprit Bumrah, Md. Siraj.

Net bowlers: Ankit Rajpoot, Avesh Khan, Sandeep Warrier, Krishnappa Gowtham, Saurabh Kumar

Standby players: KS Bharat, Rahul Chahar.

BILEMDANGANG

"Meranga inyaker atema ajak takoktsü, saka azümesenertemi metenzük tsüngda toktsür."